

Թ .

Ճառ արմաւենի ես դուն որ ի վեր գնացեր քան ըզիտդ,
 Բո հաւ սիրամարգդ եմ ես, գամ շինեմ ի քեզ տուն եւ տեղ.
 Անում ի սարերդ ելնում ու ծաղիկ քաղեմ սիրու դեղ,
 Թռնունք իմ շինուածք իջնունք՝ աւիրեմք շատոց տուն ու տեղ:

Ժ .

Ճառայ քո դընչին մեռնիմ որ ճերմակ է գետ կարագ եղ.
 Երեսդ է կարմիր գետ վարդ, պըռունկներդ է պագնելու տեղ.
 Օնքերդ ես ի վեր քաշել ի վըրայ բերել գետ անեղ.
 Աչուերդ է ի ծով նըման որ հազար ծուկըն կայ ի լեղ:

Ժ Ա .

Ա՛յ իմ աղբերաց արուն, որ բուսար ի մէջ քարերուն,
 Աչուիդ ի նարկիզ նըման, մէկն ի քուն ու մէկն ի գարթուն:
 Վախեմ թէ ըզքեզ որսաց ու գրկեն զիս ի քո տեսուն.
 Առանց քեզ ես ո՞նց ապրիմ կամ տանի իմ աչերըս քուն:

ՏԱՍՆԵՐԿՈՒԵՐՈՐԴ ՏԱՂԱՇԱՐՔ

Ա .

Ես ան հաւերուն էի որ գետինն ի կուտ չուտէի,
 Թռչ՛ի երկնօքըն երթ՛ի, թէ սիրոյ ակնատ չընկնէի.
 Ակնատն ի ծովուն միջին եր լարած՝ է ես չըզիտէի.
 Ամեն հաւ ոտօքն ընկեր, ես ոտօք ու թես աւելի:

Բ .

Ամուր եմ քարիդ նըման որ մրճիկն ի յիս չիբանի.
 Բարձր եմ թուխ ամպիդ նըման որ ոչ ով յիս չիհասնի.
 Աղեղն եզնենի լինի ու լարն ի վերայ գալենի,
 Զաշողն քաջորդի լինի, հապայ թէ իմ սիրուն հասնի:

Գ .

Խնծորն ի ծառին ճըղին, ի ճըղին ներքեւ տերեւին.
 Զընցկուն իմ եարին ծըծերն ի ծոցին՝ ներքեւ շըմաթին.
 Արեգակն ի ջուր իջել, լուսնեկան ու կուժն ի յուսին.
 Նա քալեր՝ ճօճկըտար միջին, լօք ելնէր շամամն ի ծոցին: